


祭文  
雜著

牛山集

上







牛山先生集卷之九

祭文

鏡湖祠宇奉安祭文

鄭參判運忠節祠

惟靈桓桓熊羆仡仡千城護軍慷慨武穆平生忠孝  
全德繩墨律已喪元初心裹革壯志虎躍英名龍韜  
石畫直道而行剛腸不屈數邑分憂百代清芬邊鄙  
多聲注意方勤鹿島孤城咽喉南東九重承任千里  
折衝銘劒自誓盡忠報國死而後已無愧背涅島夷  
梗化旌旗蔽海釜菜失守嶺南瓦解棄戈相望疇敢  
敵愾賊勢騰風 鑾輿播越羽檄星馳安危呼吸公



乃奮義泣血催楫按劍抗辭主將動容樓船舉帆鼓  
勇洋中諸葛呼風祖生誓江四伐五伐雷擊卷撞風  
雲合變奇正神謀烏號星發浮屍塞流如雲賊艘迎  
刃破竹推鋒乘銳所向無敵漲天火焰訾鬼軍聲睢  
陽保障益州威名自夏徂秋荷戈披甲師直爲壯大  
勲將集天胡不佑毒丸遽及賊未盡殲公豈瞑目氣  
佐山河光并日月宇宙棟樑歲寒松柏敵人摧沮乃  
公之烈 宗社重恢乃公之績 至尊震悼朝紳歎  
服立祠 贈秩吊祭廢旌竹帛英風泉壤疏榮矧我  
南鄉賴免魚肉到今受賜景慕彌切鏡湖一曲仁里



之傍置廟妥靈庶冀洋洋千秋香火自今可繼謹將  
牲醴恭伸奠禮遺徽如昨聳動後生瞻式有所小據  
微誠

序

忠孝傳家說贈宋持平英甫序

余少時聞宋奉事

壽龜

與其弟圭庵先生忠孝俱至幼

年喪母任情過哀所伏苫席曰淚必腐鸞巢廬幕生  
雛皆白人以為誠孝所感後圭庵立朝名動一時及  
仁廟即位圭庵不量時勢欲做三代事業羣奸側  
目竟得重罪壁書之變李芑會賓廳錄罪人名點其



當死者至圭庵苞大點之鄭順朋曰此子可惜苞不  
聽殺之後苞謂人曰宋某豈不是善人但行大事不  
可拘小仁譬如作室欲修基址則雖有奇花異草不  
可不芟刈也李判書潤慶與其弟議政公同有時望

仁廟末判書公子中悅與其友李輝有私語犯時  
忌及乙巳難作中悅欲以輝言告變自明稟于判書  
公公曰身死雖可惜朋友豈忍背乎中悅問于議政  
公公曰不可爲朋友而自就死地也中悅乃自告于  
朝而亦不免死乙卯倭變判書公尹全州議政公以  
都元帥鎮羅州貽書于判書公曰賊鋒甚銳願兄勿



進兵少避判書公答曰吾受國厚恩當以死報遂以  
兵赴靈巖助戰得捷云嗚呼彼宋李兩家忠孝大節  
雖在千百載之上人無不感奮興起況近代乎生也  
最晚既不得登門覲德則景慕風義徒切山仰思識  
其子孫屏伏避荒聞見未及曩在癸丑年間余寓居  
洛下時有宋邦祚永叔者登第筮仕以行義為儕輩  
所推許余問其先世於人則宋李兩家是永叔之內  
外祖也余私喜幸自語平生宿願庶幾可償一日遇  
永叔於隣舍聆其音聲接其辭氣非悅草戰豺之類  
而宜其為忠孝家子孫也甲寅冬余搬家南下杜門



牛山深谷自此京鄉隔絕夢寐不到永叔之卒於西塞也經數歲因人聞訃痛傷特甚以為永叔既不幸早世雖有諸子想未及成長矣未知其昆弟幾人而亦有如永叔者乎嗟歎不已最後人有自京來者語及廢論謂余曰去丁巳司馬榜榜首傳會邪議劫諸生上疏請勿拜西宮有一士子非徒不叅覲疏獨詣西宮依例拜恩人皆謂之堅剛不屈者爭相稱譽子其聞歟余問其姓名其人曰姓名則不知而居湖西者也余曰今世豈有斯人此必傳之者誤也然猶不忘于心會趙江陰德安偶至溪上余問無恙外



不暇出一言先以此事詰之德安曰此乃宋佐郎永叔之弟而名某字某號睡翁者也曰言睡翁其時舉措及平居言行纖悉備具余喟然歎曰不有是兄焉有是弟加寶田杜氏數等而宜其爲忠孝家子孫也丙寅閏月睡翁自沃川訪余於牛山余時以事適在松山舊庄睡翁留書曰嘗以同時爲幸而每有地遠之歎不意今者進駐孔邇竟值巧違同志之一見亦有數歟然神交已久豈以不面情意有損也遂悵然而去余以此爲平生至恨丁卯春余領義兵至全州睡翁以散官亦來屬撫軍司幕下余曰與同處累日



未幾行朝命罷義旅余卽解兵而歸睡翁拘於事  
勢為姑留計客橐無糧資余傾一行餘儲以贐之握  
手揮涕而別居無何睡翁亦還家臨行寄書曰國事  
罔極言之痛哭羞辱之極萬古難雪只恨吾死不早  
以致此事及耳徒憤慨無益則欲決意入山以終餘  
年卽當還鄉以卜藏身之地然後擬進兄所展此衷  
曲而何可必也明年戊辰夏四月睡翁病歿道途綿  
遠邈不聞知庚午冬德安書以報之余為位而哭哭  
之長慟以為睡翁真趙嘉之流也噫永叔早世睡翁  
又逝天何奪善人至於此耶天意未可知也雖然忠



孝家子孫豈止於斯二人乎當必有繼之者尋常言語間每向人說不置後永叔子時瑩以主簿微官丙子之變入江都同仙源金相公死節今並享忠烈祠睡翁第三胤時烈英甫以學行為世名儒望重朝野古所謂青成藍藍謝青者此也忠孝家子孫久而愈顯雖四代翟氏無以過矣英甫以余爲睡翁知己上年季冬命駕來訪相對悲歡破涕爲笑英甫曰請余曰吾先子知己莫如公願記一言以爲家傳余感其至誠不敢以不文辭第其言行遺蹟已載於諸公記事而清陰金相公所撰墓碣銘尤爲有道不愧之文



則以余犬吠驢鳴其如玉上加泥取人譏侮何雖然  
越千里來辱之意不可不報塞聊書所懷如右以答  
其請又以一說繼之於後惟英甫察之英甫其時行  
色忙遽不得信宿而去雖欲贈言尚可得乎只以先  
賢之出處可疑近世師友間脫節之未盡者為英甫  
畧及之英甫其亦記憶乎否英甫得之於家庭質之  
於先覺學博而行全識高而見明其於出處大節不  
待人言而講之熟矣余何敢容喙於其間乎顧余年  
逾七旬去八纁五此日之別即是永訣歸見睡翁當  
在朝夕睡翁倘問贈吾兒何言云則余將無以為辭



僭易及此未知英甫以為何如詩曰風雨如晦鷄鳴  
不已吾英甫勉之哉

附宋英甫書

昔年委晉門下獲償平生積慕然彼時行色甚忙  
未得穩承清誨茹恨在心蓋至今而未沫也前月  
晦間務安宰禠到今春所惠書及序文一篇濯手  
莊誦蓋至於墨渝紙弊而不敢釋也序末致意尤  
警切精篤教生雖萬萬無似敢不終身佩服以不  
負君子以德之愛也噫先人平日不知不肖而期  
待甚重誨責甚篤然質既卑駁行又不力尤咎日



多悔吝山積甘自棄於小人之歸倘或曰此改圖  
果有進益則文丈真不負先人而先人取友之端  
於此而益驗矣未知此志終不渝也否信後暑雨  
蒸鬱未審靜裏起居萬福仰溍如渴教生箴縮窮  
鄉菽水屢絕雖吾道固應如此然人子之情不能  
不傷歎也相去絕遠未涯承際實覺悵恨伏惟眷  
龜珍莊歲久益神更祝加護晚景以副遠誠不備  
戊子六月二十九日教生宋時烈再拜

傳孝堂贈主人序

南平奉秀混曾祖及祖父兩  
世以孝名後人扁堂曰傳孝

孝者百行之本而世之為孝者鮮雖間有其人而至



於傳子則古未嘗有也今於南平奉氏家見之矣奉氏曾王父以孝聞其子能繼先志行尤著稱江鯉之躍猛虎之隨荀非孝感何以致此生乎末俗得見斯人其亦幸矣傳孝扁堂豈不信哉後之登此堂覽此扁者其不孝者思以為奉氏之孝其孝者思以為奉氏之傳則奉氏之孝不獨為奉氏一家之慶將見人觀感其有補於世教也大矣猗歟盛哉梁遂初言奉氏第三子年十餘歲兒以其父居喪終三年亦不食肉云非其出於天性者能若是乎他日鯉虎之感當復在於此兒奉氏勉之哉勉之哉



記

牛山田舍記

牛山田舍者冰壺子暮年棲息之所也牛山寶城址村名在寶城順天同福三邑之交距寶城六十里順天百餘里同福則五十里曹溪山在其東北鷄足山在其東南天鳳山在其西南茅後山在其西北四圍環合皆名山也牛山處其中央距曹溪天鳳兩山十餘里鷄足茅後纔五里許路通三邑而皆崇山峻嶺深林窮谷艱險無比至此始平曠舊多居民亂後流亡今只存十餘家丁酉兵火之所不及其幽深可知



牛山有內外兩村皆背卯面酉其外村則東峯為主  
山是鷄足之一支也鷄足一支統村之左為南嶺東  
峯一支統村之右為北岳茅後一支抱村之前為西  
山即村之案山也東峯高低起伏而來約可數里許  
盡為原可容百餘家上有長松萬餘株鉅竹千挺下  
有筭湖深可數丈魚大小不可勝數湖之東渚有石  
壁壁兩頭皆入湖心可作釣臺西山之外有大溪環  
焉其名曰竹川發源於長興獅子山北馳百餘里至  
村西十里許與當川合當川者即同福赤壁之下流  
也過西山至南嶺下為印潛淵至釣臺下為石灘潛



淵深不可測泛舟汭泗可三四里淵之東南雲壁屏圍西北明沙練橫壁面丹楓苦竹縈錯如繡翠禽白鳥飛鳴下上乃一區最勝之地也石灘清淺可涉灘臺之間有洲長可里許廣可數十步其南則潛淵而西石灘東尊湖三面皆水有松五六株無他雜木每夏秋盛漲水襄洲上則三水混合渺然爲一巨浸釣臺左右夾以兩澗南澗則自南嶺遊谷而來北澗則自北岳後洞而來會合于竹川東峯之北別出一支西來數百步爲內村之主山主山之南又出一支繚而曲約數百步峙而爲峯與北岳相對其中別爲一



洞洞之左右巖石錯落如散碁巖底有泉流下洞口  
與土澗合泉澗之間曠可百餘畝相傳是國初名僧  
無學所居其母墳今在釣臺南距村纔一里許潛淵  
石壁之上有一條細路橫渡南澗傍石灘經長洲指  
土岳外而去洞門深鎖行人過者殊不知洞裏之有  
人家也余欲家于洞中而置亭於釣臺以為舒眺望  
接賓客之所自洞至亭纔數百步可杖屨來往也南  
嶺土岳西山之間土地饒沃水陸田甚多若穿渠引  
竹川水灌于西山之下則每每廬原皆可種以秔稻  
鍾雲渠雨真所謂鄭白之沃也遊谷在村之左其深



十許里有泉石之勝陸田不可勝耕自經亂離居民  
散亡殆盡田多污萊草樹蒼蔚只有數三人家以其  
谷太幽深非鳥獸與同羣者不可居也牛山傍近如  
曹溪茅後天鳳諸山多有名寺而曹溪松廣寺名聞  
一國自村抵寺細逕並江而上約可十許里有時乘  
興尋僧亦一勝事也余少多疾病性且踈慵不合於  
時惟以畢命丘園為心自逢兵亂以來尤無意於人  
世常欲移家入山考槃澗谷而溪山佳處每恨其土  
薄難耕艱食為患家累相牽未能決去恒鬱鬱不樂  
頃在丁未年間同郡林掾叔瞻來訪日與同宿是夜



夢與叔瞻及朴君而認彥章相可居之地行到一處  
山明水麗樹木葱蘢景物甚佳余謂二友曰此地可  
居但西北山豁受風此可恨也叔瞻曰若多栽松竹  
歲久蒙密則當無此患也目相與賦詩數篇蝴蝶忽  
驚蹶然而興則乃一夢也詩盡忘只記吾詩滿天風  
露月光寒一句以語叔瞻且說夢中所見山川形勝  
叔瞻曰早晚當得佳地如此夢也余自得此夢五六  
年間想像不能忘恒往來于心曲越四年辛亥余自  
寶城松山別業搬家還京治駱山梅溪舊壑而居之  
冀紹堂構之業顧以鄉思難禁桂玉多艱懷歸未果



每切斲繫之悲癸丑之冬余往寶城路出曹溪山中  
投宿松廣寺明發向松山行十餘里清江白石處處  
佳勝而恨其地皆磽瘠不可以廬也行至郡北六十  
里許登一峴山下一村頗瀟灑幽寂問之僕夫則曰  
此牛山村也余俯瞰而過殊不以經意也既留松山  
數月彥章相過留宿語及牛山曰問彥章果彥章之  
所嘗遊歷也彥章盛稱溪山之勝且言其田饒且多  
可以卜居余聞之喜甚叔瞻亦以書賀其決因携叔  
瞻彥章往視之自松山六十餘里三人並轡沿江行  
到牛山周遊歷覽則果昔年夢中所見也山川宛然



一一符合而西北果豁二友亦在焉其奇事也余以前夢語二友亦皆記憶而叔瞻則能誦吾夢中舊句相與慰賀而歸遂定移卜之訃而可宅之地方爲村民所占無隙可廁於其間意甚恨也既而其人聞吾欲得之遂詣吾求售許以遷居側近而歸其室於吾永作同社之好余回以重貨易之越明年甲寅杪秋自京盡室南下而往家焉牛山與松山庄相距一日程我於山水求之亦切經行茲地非止一二而四十年來今始相遇物各有主遇各有時正謂此也噫人生百年之內閱世如蜉蝣古人遂旅過客之說真善



喻也固當安土順天以畢餘生而第松山舊居迫近  
城市塵囂惱我久有意於遷喬而未果也今日牛山  
之卜只取其幽寂之趣而恨其得之太晚來日無多  
享此清閑之樂其與幾何余今年踰不惑半百已近  
造化真宅之歸想不遠矣一念眼眼不無齋景之顧  
懷好生怛化固衆庶之常事也古今牛山真箇一轍  
有愧達觀時復自笑抑吾靈臺之中亦有別乾坤一  
安宅仁山智水萬物皆備無邊光景不減沂上之興  
而弱喪年來茅塞久矣倘能迷道知返復我之初則  
雖蓬蒿陋巷必將有靜觀自得之妙矣不然而墮埴



冥行迷不知復從以擺弄烟霞追逐雲月而已則雖  
有加牛山數等之泉石亦未免為玩物喪志之歸山  
不負吾而吾負山矣其於吾安宅何在京諸親舊問  
我新居形勝如何或有恠我既來而復去者余既以  
實荅之如右而回筆以記之欲目以自警焉

附吳翰林

希道

跋

大凡世之所謂可樂者處二塗焉仕宦與山水也  
故君子之不得於朝者必擇遊棲之所以寓其樂  
焉豈非偃仰考槃之樂足以敵紱冕之榮也哉然  
而為仕宦者必服纖馳良朱丹其轂耳咽竹絲之



音目眩黛白之色故其樂也醲而厚居山林者登  
芒濯清折芟燔松寂寥枯槁無豐泰之享故其趣  
也淡而薄厚者易溺淡者易厭人性然也惟其不  
溺於人之所易溺不厭於人之所易厭非君子之  
自樂其樂者不可冀矣故世之人率皆舍此而慕  
彼棄內而趨外不得則求而得之既得則求而固  
之皓首乾沒迷溺不返者踵相接也間或有有志  
遐舉而亦未免牽情擬足不能長往或既往而不  
能久或既久而不能終若然者其心出入於君子  
俗人之間而無所得於仁智之真樂者也是以塵



路小達人之跡林泉無俗士之廬矣余見水壺公  
弱冠慷慨千里尋師馳驟仁義之途若蒲梢駃騠  
焉名聲溢於談者之口孝悌著於鄉黨之稱挾是  
而往求行道於聖明之世借吹噓於公卿之間則  
吾見其易為力而無難事矣顧乃薄顯仕而不慕  
外美名而不求自京輦而還于鄉自故鄉而入于  
山惟恐去世不遠潛跡不密選勝卜居以爲終老  
之所自謂發於疇昔之夢而協諸平素之願觀其  
立言述志又不以徜徉脫略誇詡於俗子之觀而  
汲汲焉惟以靈臺之堙晦舊學之茅塞爲恨不徒



樂於山水而求諸方寸不沒情於外物而惟務在  
內要使仁山智水截然浩然於吾心之裏則其於  
流且峙者必能默契於動靜之體而樂之不倦矣  
茲豈非不溺人之所溺不厭人之所厭者耶既往  
而能久既久而能終者其在斯人歟其在斯人歟  
噫世已末矣仁義路荒山水之知樂者鮮矣見人  
之樂山水而不譏而笑之者亦不多見則見冰壺  
之所樂而知冰壺之所養者其亦君子之徒歟余  
雖蒙淺而山水之癖則得於性者然也見牛山之  
記而心豔慕之不能無一言以尾之若其山川觀



望之勝則他日從遊尚能為公賦之

題跋

書抗義新編圖後

某於先生雖未及登門覲德而竊嘗景慕風義自聞  
殉節以來尤切山仰其遺文事蹟世多未傳恐或久  
而泯沒積年搜訪僅得封事雜著總若干篇分類為  
全集凡六卷一陳時務二救師友三論朝廷四請絕  
倭五舉義兵六雜著將欲傳諸同志以謀不朽第劇  
切貴近仇敵滿國百年論定之前決不敢輕以示人  
於是撮其中請絕倭舉義兵疏章書檄附以碑文言



行別為一書名之曰抗義新編既又抽得八事令盡  
手李澄寫以為圖置之卷首俾觀者目擊而思存雖  
愚夫愚婦亦得以聳慕而興起焉老泉所謂像亦不  
為無助者此也至於躬耕賓禮兩圖或者以為不切  
於此錄殊不知先生之忠本於孝移而忠孝之道又  
本於服事先覺而待之生三事一義無二致也雖然  
先生身乎今而心乎古者也不得其心而惟跡之求  
則區區毫墨固不足以知先生古人言書不盡言圖  
不盡意然則觀乎是書者盍相與求其心焉

書月沙所著抗義新編序後



吾友月沙李公廷龜爲諸生時讀書山寺聞有通信之行草疏極言其不可撤榻下山將爲叫閤之舉時公之妻父權公克智爲大司憲公先見權公謂曰不可通好篡酋大義甚明而朝廷無一人言之者吾欲抗章昌言之丈人方爲言官亦不當齟舌無言權公取其章覽之歎曰此論極是極是然儒生何必上疏吾當以此意論 啓君可姑止遂刪去請斬倭使等數款盡用其文而爲劄上之 答曰劄陳忠謹之論深嘉爲國之誠但廟堂豈偶然計而如是議定乎茲未得從之公時年尚少與先生素昧平生而千里



中山先生集卷九 十一  
之外所見不謀相符如此真所謂魯有兩生而不可  
謂秦無人焉今此序引公樂爲之當筆者蓋亦意氣  
相感而覽是書者之不可不知也

書東還封事後

右我 昭敬大王七年甲戌重峯趙先生以質正官  
赴京諦觀 中朝文物制度之盛意欲施效於東方  
及其還也草疏兩章切於事務者八條開於根本者  
十六條先生先上八條疏及質正錄一篇以爲我國  
當一遵 明制 先王批曰千百里外風俗不同若  
不揆風氣習俗之殊而強欲效行之則徒爲驚駭之



歸而事有所不諧矣於是先生知言不用不敢更上  
後十六條疏而今其遺稿猶幸尚存竊觀先生之志  
不止於效行 明制將欲自此推而上之挽回三代  
之治而 明制尚不許施行則他又何望茲所以括  
囊退藏者歟噫先生生于嘉靖甲辰而以萬曆甲戌  
奉 命觀周則是時先生年纔三十一而其見識學  
力已造高明正大之域則實吾東土箕封以來數千  
載間間世鍾英傑出之真儒也有臣如此而言計不  
用終身坎軻竟以伏節而終豈不痛哉愚自弱冠之  
日欽仰先生不啻山斗嘗恐事跡泯沒無傳積年搜



訪僅得遺文若干篇類為全集欲剞劂廣布以圖不朽而卷秩頗多工役未易姑撮其中請絕倭舉義時封事諸篇及傳信言行錄題曰抗義新編刊行于世矣今又以此兩疏別為一書名之曰東還封事後之欲知先生者當於抗義編觀其精忠壯節於此封事中考其經濟大志則雖不必遍觀全集而亦足以知先生之槩也蓋先生篤信好學守死善道明誠兩進有體有用而所以行之者一也如使先生生於泣麟之前得逮桓衣於洙泗之間則吾知先生必能優入升堂之列而決不在七十子之後矣嗚呼盛哉



書湖南義錄後

嗚呼余徃在丁未年間嘗拜月汀先生於門下終日陪話月汀曰湖南古稱多節義之士壬辰之亂死義者幾人高招討金倡義外吾未之有聞也余以崔兵使以下十餘人言行事蹟一一陳列月汀大加歎服曰子爲我記其事蹟爲一通以來吾當作序跋附于編末以圖不朽也余唯唯而退憂患沉埋徃年十餘年未及就稿而月汀遽捐館舍矣余惜其志之未遂痛傷特深獨處溪堂追思月汀之言仍編集是書名之曰湖南義錄書既成客有難余者曰此編所錄有



開世教誠為可嘉抑壬辰丁酉之亂吾湖南文武士  
夫死於凶鋒者不可勝數而子只取崔兵使以下十  
餘人何也余曰不然彼文武士夫之死於凶鋒者豈  
盡皆明白死義之徒乎若死義之跡不甚明白則不  
可使吹竽混真於其間也蓋此十餘人之外或不無  
明白死義之人而余未及知者則吾將以俟夫後之  
君子而續筆焉客曰亂後死義者固不止湖南子只  
以湖南義士編為一書而他死義之士則不得與焉  
亦有意乎余曰不然余病廢杜門聞見不廣人之為  
言亦或不公一道人物尚不能詳知况於遠地其何



能得其毀譽之真乎此余所以不敢不謹非有一毫

私意於其間而去彼取此也至如宋東萊賢象之君臣

義重父子恩輕金義州岫汝之國恥未雪壯心成灰劉

助防克良之義不退生甘心死綏邊海南應井之涕泣數

日踵死重峯李金海宗仁之腋挾兩賊大呼投江李兵

使福男之冒八圍城同死天兵其精忠壯節人無間

然者則余之景慕豈在於十餘人之下哉客曰然則

子何不以此六人並錄於編中乎余曰不然十室之

邑必有忠信夫以湖南一道義士之多至於十餘人

則一國之內死義者豈止此六人而已其中必有余



未及知者矣今只以此六人並錄於編中而他死義之士或有遺焉則雖曰余未及知其不敏之罪將與蔽賢者同一歸矣今吾只舉湖南義士余所詳知者以爲是書其意不過如此而已客釋然而退日記其語跋于尾以志余編集是書之意云

書靜庵先生遺蹟後

謹按靜庵先生方被寵遇 經席之上每以崇道學正人心法聖賢興至治之說反覆 啓達辭旨勤懇中廟傾聽一歲中超拜副提學先生遂以致君經濟爲志知無不言多引清流布列朝廷欲革近代拘



常之習以遵古先哲王之軌于時流俗大臣多不悅而莫敢言士林興起而間有好名者雜進論議太銳作事無漸先生以爲做事不可卒迫當以漸進與申公錦李公耒權公櫟每抑儕輩之喜事者於是浮薄之徒反以先生爲依違苟循迹同愴邪至有欲彈劾者先生自知事必敗白上曰臣學術不足而爵位過高欲得一閑僻之郡讀書進學然後乃復立朝而聖明不許故眷戀遲回臣罪大矣嘗一日先生與金公湜金公綽諸友會話崔猿亭壽域自外至立而不拜急呼金湜曰老泉可飲我一器酒卽與之快飲



曰吾乘敗船幾溺心甚怖悸今飲酒釋然也亦不辭  
徑去座中恠之先生曰敗船之喻指吾輩也顧諸君  
不知耳然則先生非不知時之不可爲道之不可行  
而猶未敢決意遠舉卒之身陷大戮國隨以亂使後  
人反以爲深戒不復有爲天實爲之謂之何哉雖然  
吾東方理學無傳麗季鄭圃隱始發其端而規矩不  
精我朝金寒暄接其緒而猶未大著及先生倡道  
學者翕然推尊之今之知有性理之學者皆先生之  
力也然則先生之道雖不顯於一時其有功於後世  
可謂盛矣



書善養疏劄後

余往在庚辰年間抗章論事其中如金尚憲鄭蘊俞伯曾介和一欸初以愛君憂國之誠光明正大之氣許之後以扶植綱常之志慷慨直截之言改之時俞叅議子修牧綾州見疏謂余曰愛君憂國光明正大此八字於三子未為不可而君之初許後改何也余荅曰凡告君之辭一言一字不可不慎不然是欺君也慢君也欺慢君父豈臣子所忍為哉吾當為公言之公其聽之趙綱之駁洪瑞鳳設或過舉綱即諫官也金相之論啓請囚前古所未聞又跡涉於黨同伐



異此果光明正大者乎南漢危惡之日為臣子者死則死不死則陪君父出城若青衣吐行則抱持號哭如李若水可也若還宮則當與同志竭誠戮力痛陳後讐大義言不用後解職還鄉尚未晚也彼金鄭二公計不出此只以斥和一事僅塞其責而鄭公則尤有所未安者既退之後不能杜門絕迹指喉覘魁餘孽無賴子弟夜入祠宇偷出位牌此非光明正大者所能為也俞伯曾之論事雖曰直切而惟尹昉金瑬而已至於金自點則一言不及其與光明正大大相懸絕余之所改蓋以此也未知公以為何如子先



公之族弟也聞之必讐余矣子修曰君與子先素昧平生何以知子先乎如使子先少有讐怨之心則非子先也其後子修言于子先子先無一毫滯礙而先以書再三問訊曰爲神交未幾子先得重病沉綿累歲竟至不救痛哉痛哉子先既歿子修諸友以其疏劄千里專人屬余編集余悲感嗚咽不忍披閱投諸篋笥過數月出而讀之疏中所斥皆是與子先世世同志之人而昌平誤國之罪亦不過臨亂無謀恇惴之所致也其視先王朝甲申後任事之臣不計國家安危生民休戚如鹿屯屯田海西蘆田玉井子孫



推刷尤可以失人心者無所不至沙火同之類處處有之猶且交通日本悉罷防備皇賜銀絹四心都忘先事豫謀之策反以為妖鬼竟致壬辰之變而當時大小臣僚無一人言之則若子先可謂知有國而不知有其家知有君而不知有其身者彼偏私護黨忘君負國之輩其不為子先之罪人乎宋孝宗嘗言伏節死義之臣難得張南軒對曰當於犯顏敢諫中求之平時不能犯顏敢諫他日何望其伏節死義此真擇臣之要法聖人復起不易斯言矣雖然忠直之臣知無不言言無不盡其事必涉於瀆擾牽裾折檻



責難陳善其言又苦而易忤僥倖之臣卑遜謙恭突  
擗脂韋其貌有似於敬君阿諛順旨側媚逢迎其說  
又甘而可悅積悅生愛積忤生憎愛憎分而黜陟行  
終至於忠直盡去佞倖盈朝國家之元氣大敗而喪  
亡隨之未知子先其亦有見於此以伏節死義自許  
而能爲犯顏敢諫者乎天地間至大至剛之氣唯子  
先善養而得之矣不意吾東方末世而有斯人也噫  
子先之清名直節如彼其卓卓而以其子曰狂出走  
仇疾者乘釁籍口至以無理之說不近之談加之於  
身上設使子先誠有是事於古人處變之道有所未



盡而已非爲大段過惡而覓疵求癥如恐不亟何氏  
所謂謬用其心此輩當之寧無愧乎子先當今第一  
人也一代名流無非與子先交遊者如余則牛山一  
叢翁耳貴賤懸殊京鄉隔絕紫芝眉宇未嘗一接編  
集之托不在於彼而遠及於此余何敢固辭以負子  
先平昔期待之至意也於是遂分類爲陳弊論事二  
編總名之曰善養疏劄此編倘不至於泯沒無傳使  
後之偏私護黨忘君負國者得有所觀感而興起焉  
則其於世教豈曰小補之哉

書老辣隨辭後



右故迺平府院君李相公遺事而余所纂輯者也余年後於公十六歲各在京鄉未得源源相從特以義氣許為心交公以余為知公者莫如余余以公為知余者莫如公公自少出入牛栗兩先生門下年有少長時有先後縱未及一時並登亦不可不謂之同門也竊見公之言行出處則癸未年間栗谷為羣小所構禍將不測人皆畏縮無敢出一言伸救者公挺身獨當不計利害前後疏章非止一再於是以公為黨論一邊人無不擯斥已丑逆變公力救鄭相彥信及白振民然後人始稍稍歎服矣至如鄭仁弘則與公



為平生仇敵國人所知而戊申年仁弘被竄時公言  
于當路而救之其言雖不得見施人皆知公前日許  
多陳疏不過救師友而已非為其黨論也及其反正  
後十餘年當國處事之際論議之間雖或有好勝過  
激之病原其本心則非有偏私是以無彼無此萬口  
一談皆以為君子人也語曰侏儒觀一節此數款雖  
小亦可以知公之大槩矣言之至此又有所悲感焉  
往在乙丑冬余拜公於寓宅其時月沙亦適至於是  
相與鼎坐從容談話語及重峯月沙曰吾東方萬古  
綱常非重峯幾乎墜地重峯事業非士彥將至於泯



沒無傳天既生重峯又生士彥其意非偶然也公曰  
諾因戲之曰士彥於重峯未及登門覲德而猶尚如  
此況如我既為知己又為同門則士彥豈獨為重峯  
之士彥乎余荅曰余之為相公士彥則易矣竊恐相  
公不得為士彥之重峯也仍相與戲笑而罷後數日  
公袖一卷書來至鄙所謂余曰吾之平生事蹟略備  
於此但語多支煩君須置諸左右時時披閱以君所  
見刪削可也日出而贈之乃甲寅年推考草也厥後  
余又與公會滄浪翁家打話滄浪時病不能起居吾  
兩人獨聚首團藥滄浪扶而起顧而戲之曰我則病



已至此無復可為觀二友相與好嫉妬之心自然出  
矣曰噓唏歎息吾兩人不勝悲感揮涕各散未幾滄  
浪竟至不救其後六七年間公及月沙相繼而逝惟  
余一身孑孑獨存每念及此不覺涕泗交頤也後丙  
戌秋公之孤迺陽迺城兩相公以公平居日記囑余  
編輯余反覆思之公之親舊零落已盡此編之錄非  
余其誰遂分類為八總名之曰老辣奴達切辛甚曰辣遺編  
或問老辣是何意余曰昔秦檜使所親說晏敦復曰  
公能曲從要地朝夕可至敦復曰薑桂之性老而愈  
辣吾豈為身計誤國耶檜卒不能屈余老辣名編卽



此意也又嘗一日夜余方就寢有人來謂余曰遺編二字請改漣辭既覺乃一夢也余心甚恠之未知漣字義意遍考大廣益會等諸書漣滑也於是改名曰老辣漣辭不意昔時戲言今反為真談也追惟笑語琅琅在耳言念容儀宛宛於目悲感之懷不能自已抑余今年八十小一疾病沉痾地下相逢想不遠矣悲不幾時而不悲者無窮賴以此自慰未死之前其何堪宛宛琅琅今於編末聊叙首尾如此未知後日吾三家子孫其亦有覽此而同一悲感者歎噫噫傷乎傷乎



書霽峯先生檄諸道書後

霽峯先生出師檄令人讀之莫不聳慕而興起至於  
丹心脫節白首腐儒聞半夜之鷄未堪多難擊中流  
之槓自許孤忠不覺涕泗之交頤信乎有德者必有  
言矣古人謂讀諸葛亮出師表而不流涕者是不忠  
也吾於此文亦云滄浪翁嘗言不獨忠肝義膽字字  
可見文章之妙冠絕今古崔致遠黃巢檄後惟此一  
篇而已

銘箴

大愚菴銘



人愚我我不愚愚不愚是大愚、

口箴、

言而言不言而不言言而不可不言而言亦不可口乎口乎如是而已



牛山先生集卷之九



牛山先生集卷之十

雜著

買還問答

癸巳春正月客有自遠方來者乃主人舊面目目與  
留宿於買還堂數日矣一日客謂主人曰君臣際會  
自古所難而三代以下惟劉先主諸葛孔明秦符堅  
王景略而已我朝則中廟之於靜庵宣廟之  
於牛栗可謂聖賢相遇矣靜庵立朝未幾為權奸所  
搆殺志士至今冤痛栗谷早卒牛溪獨存竟被謾間  
不得於君平生以罪人自處至於臨終遺命薄葬



襲用布直領冠用染黑布程子冠黑帶紅紙書銘旌  
曰昌寧成某之柩牛車載柩編茅覆棺勿用石灰云  
云牛溪何以得罪於宣祖至於此極先進已逝記  
者無人設或有錄其一二者當今之時偏黨為主其  
所記錄未必盡出於至公無私後生何以的聞其實  
願主人爲我略言之主人曰善如子之問也善如子  
之問也自東西分黨以來朝廷之上是非混淆邪正  
雜糅其間許多論議雖車載駟運難以悉記姑舍是  
只以已丑以後人所共知者爲子陳之子其聽之已  
丑遂變牛溪承召入京時黃慎以正言論啓鵝溪



上大怒卽出黃慎高山縣監人言於鵝溪曰黃慎  
啓辭全出於牛溪指揮以此鵝溪大啗牛溪怨入骨  
髓每與人言輒曰有一長者欲殺我我必死矣送獄  
幾畢西崖謂松江曰上春秋漸高後宮多王子國  
本未有所定建儲一事非大臣之責乎吾輩當力爭  
松江曰諾時鵝溪爲領相松江爲左相西崖爲右相  
松江與鵝溪西崖期會于闕下鵝溪再約而再不  
來後於道中松江首先陳啓上不悅鵝溪西崖無  
一言惟副提學李誠中大司諫李海壽進曰此非獨  
鄭澈之言皆臣等所嘗共議者也盖上意多在信



城君矣於是譏人乘時以為鄭澈一隊將不利於信  
城君鼓動訛言轉入關內又使申砬率宮奴守護  
信城君以致上心疑惑大惡松江必欲罪之辛卯  
二月上特出李誠中忠清監司李海壽驪州牧使  
於是臺諫揣知上意遂請罷松江而上特命榜  
示朝堂七月兩司合啓請竄松江以下數十人上  
特命安置松江於江界其餘或定配或削奪或罷職  
壬辰變初臺諫論竄鵝溪又請斬金公諒爭之甚力  
上答曰國可亡予不忍殺無罪之人及大駕西  
遷上至臨津渡問牛溪所居李弘老以兵郎在前



指近岸小村曰此是也 上曰然則何不來見我乎  
對曰當此之時渠豈肯來見弘老曾往來知牛溪所  
居僻遠而欺罔如此七月牛溪避賊朔寧時前府使  
金漬招募鄉兵自以人微望輕欲推牛溪為大將聽  
其節制上章 行朝末曰天命人心已絕於 殿下  
請傳禪于世子云云 上以為此非金漬所為必是  
成渾指喉及牛溪承世子召命自朔寧入成川弘老  
言於 上曰成渾負一國重望而已歸於世子事無  
可為者臣等死矣未知 殿下何歸焉及牛溪入  
行朝弘老又曰成渾此來不過為世子圖內禪也前



後構誣無所不至牛溪全然不知及登對 上下教  
曰卿何日還歸世子所乎對曰當初先承世子召命  
故來于成川今至此若無 上命何敢徑還 上曰  
然則近必留此矣於是牛溪始知其謬入惶恐而退  
癸巳正月李提督復平壤 上議遣大臣謝恩衆議  
皆以為松江可遣 上疑其圖傳禪不欲許申礪進  
曰鄭澈豈敢如是 殿下疑鄭澈則他可信者誰也  
垂涕久之礪是申砬之兄而信城君之妻叔父也以  
此 上意稍解乃遣之九月 大駕還京牛溪病不  
得隨 駕留護 中殿甲午三月二十四日入京詣



闕陳疏待罪

批曰觀卿上疏當初變出蒼黃車

駕避亂過卿廬舍之前而卿不來問自知罪重將欲死而不得今卿來詣不勝感激流涕之至卿雖病重宜調理間間叅於備邊司之謀討平兇賊轉危為安則死當結草而報之矣勿辭牛溪自承 嚴旨惶悚待罪四月二十三日上疏自劾 批曰緣予之罪國事至此方賴忠賢輩濟艱難卿宜姑恕予罪間預諸宰之列規畫邊務何如倘蒙卿之力掃蕩此賊則予不敢報卿之德而 祖宗在天之靈豈不有感於冥冥不勝涕泣之至且勿辭五月牛溪上便宜時務十



四條第一條請罷貢獻貿易市上末條論言路不開  
宮闈不嚴近習干政賄賂公行云 批曰予甚嘉之  
當下備邊司議處不踏啓字下備邊司備局回 啓  
曰十四條無非為國血誠當時切務其中第一條罷  
貢獻貿易市上尤合於今時請為先施行 答曰依  
啓後三日京畿監司狀啓曰水刺物膳亂後飢民扶  
持而來相繼顛死無路進上今聞重臣獻策備局回  
啓已蒙 允下若速行是策可以救此云 傳曰成  
渾所獻貿易之策勿為施行蓋牛溪於義州 行朝  
上劄陳宮闈不嚴言路不開之弊此劄又及之觸犯



忌諱以致所獻之策並不用焉

客曰譏間之說其來已久人多知之者 宣靖陵奉  
審不令之輩或以爲牛溪忌西崖得功以真爲非真  
云然耶主人曰當初 宣靖二陵被賊發掘焚燒之  
禍 靖陵墳中有屍未辨 玉體真偽賊兵猶在漢  
南故移其屍於松山 上命宗室諸臣偕往奉審牛  
溪與揔護使崔興源等癸巳五月二十九日到松山  
奉審之日大臣以下欲先拜哭然後奉審牛溪曰  
玉體真偽時未辨覈而先爲拜哭則是君之也吾意  
先行奉審決知爲 玉體無疑然後拜哭似當諸公



曰諾吾輩未之思也將入奉審牛溪曰諸臣逮事

先朝者只數人餘皆未覩

龍顏今何所憑據以驗

之乎宗室及後宮逮事

先朝者亦來此云先以諺

書詳記

御容以出然後乃入奉審以其所錄一一

準驗方有據依也諸公曰諾吾輩未之思也時京城

設改葬都監六月初二日牛溪自松山入京城十二

日赴宣靖陵奉審本陵發掘處十三日還入京遂

赴改葬都監大臣令奉審諸臣各具所見書納牛溪

議曰宣靖兩陵三處發掘焚燒之狀大槩如一

玉體經火未成灰者骨節分明可認玉灰色頗白異



於草木之灰其重又倍於常灰者兩陵三處皆同矣  
灰與骸雖未知真出於先陵遺體而亦不可以爲  
非真則靖陵又有玉體在壙中何哉竊觀兇賊  
所為非出於士卒收寶貨之計乃賊將所深讐我國  
者也何獨於宣陵肆兇而靖陵好全玉體乎  
且靖陵發掘之穴狹而且深壙底只容梓宮更  
無餘地於焚燒梓宮之際必須移出玉體於外  
以俟火熄然後還置壙中此賊窮凶之心何至委曲  
如此乎皆未可測也松山未奉審前逮事先朝宗  
戚及女侍預想御容先爲記錄以示諸臣然後奉



審則非徒年遠枯損無可指認肖似處其錄言 先  
王龍顏長頤骨長而此則似是方面之人 先王腦  
後平而削妨於着笠而此則似是有骨 先王年衰  
稍瘦而此則脊間平潤似是平日肥大之人凡此所  
見皆不與所錄同然頭面皮膚既落幾盡難於辨認  
察識分別無所憑据既不可以智慧求之又無可以  
事證相參臣子之情憫迫遑遑罔有所極云云於是  
不令之輩謂牛溪忌而崖得功以真爲非真欲構陷  
牛溪而不敢發越四年丙申四月遂臣李好閔白  
上曰頃日震電之變極爲非常臣竊有過慮者 宣



靖陵奉審時聞 中廟玉體嘗有患腫受鍼之痕而頗亦有驗老宰如宋贊商議可疑之際有一宰臣大言其不可其議遂寢云如此大事安有不甚盤驗而後以大言止之哉當時以體察使軍官為詭取他屍以要功若以溝壑取僵屍則方夏豈有不腐爛之理此甚可疑 上曰鍼痕之說予曾未聞極為驚駭問于大臣西崖議松山奉審顯是年久尸體而朴惟仁以手巾沾水拭背則背後左邊肩胛有二穴一大一小相去一分許故當時即據所見為啓辭臣意則常以為議定之後當依 上教厚葬為是矣其時已為



廣議以定則今不可輕議崔興源議臣在癸巳忝摠  
護使之命松山所謂玉體年久辨別極難德陽  
君夫人西陵君母朴氏扶安都正碩壽永原守德壽  
等亦來未奉審前寫出御容表著之事而與諸臣  
所見不似人多疑之他無可驗之事故臣於各陳所  
見之時以此意別書 啓達曰面上肌肉消盡頭髮  
脫落鼻梁破缺兩眼俱陷兩唇皆無胷高厚肥大  
骨節不露以手按之則柔不堅硬背後肥廣兩手兩  
脚堅枯胷下腹上橫畫有三似是鈎痕右邊臂上  
有一大破穴肩胛下左邊有二破穴一大一小腰下



臀上有破穴身長以布帛尺三尺二寸餘云他奉審  
宰相從所見別章同封啓聞行在賓廳會議定奪  
矣所謂受鍼之痕只見兩處有穴患腫受鍼與否不  
能明知故當初只以有穴書啓曰柳成龍之議近地  
掘塚可疑處禮曹叅議李瓘與本官按同摘奸終無  
所得矣伏覩李好閔啓辭不勝驚悚敢陳大略金應  
南議松山奉審時臣以禮曹判書進去崔興源與諸  
宰臣相議預寫先王玉體上憑驗之處以為可據  
之地而松山屍體與內人等所錄不同臣之所見如  
是云云蓋西崖以體察使在臨津北先聞兩陵發



掘之變使軍官往審收藏故西崖之意則以爲真也  
而崔興源沈守慶俞泓金應南李德馨崔滉宋贊李  
憲國李齊閔權徵李礪李瓘白惟咸扶安都正永原  
守等啓皆疑其非真牛溪之啓亦以爲可疑至是好  
閔附會災變投合時論以爲一宰臣大言止之所謂  
一宰臣指牛溪也未辨 玉體真偽先為拜哭是君  
之也先行奉審決知為 玉體無疑然後拜哭似當  
云云是果大言止之乎令宗室後宮逮事 先朝者  
詳記 御容以出然後一一憑驗云云是果大言止  
之乎其時如老宰宋贊輩何不立異反從其言而奉



審諸官亦無一人不從者何也若牛溪忌西崖得功以真爲非真則牛溪是大逆不道之人也玉體非真而西崖強以爲真則西崖是大逆不道之人而其餘許多奉審諸官心是西崖口從牛溪者皆是大逆不道之人也奉審一事大逆不道之人何其多也客曰西崖平生以謹慎自守雖尋常言語不敢先諸人開口獨於此大事斷以爲患腫鍼痕則不無所見而主人反以爲疑抑有說乎主人曰中廟嘉靖甲辰昇遐至萬曆癸巳已過五十餘年而患腫鍼痕宛然尚存則此是大腫逮事宰臣及後宮宗室諸人皆不



知而西崖獨知之何也 中廟患腫受鍼之說自平時盛行於中外而今之奉審以為證驗則西崖之議似為宜矣患腫受鍼之說前後未聞而西崖獨聞之何也西崖既知此腫痕與否則彼膏肓下腹上三畫右邊臂上一大破穴腰下臂上破穴西崖亦必知其為某痕某痕而一言不及何也至如近地掘塚驗其真偽此尤苟且其時賊兵猶在漢南殺戮人民處處遍滿所遣軍官何苦冒賊兵掘人塚然後 御體可得乎以僵屍方夏腐爛為執言則癸巳四月賊退屯嶺南其前逐日殺戮或有曾已腐爛者或有未及腐



爛者其爲詐自以爲得而實則未之思也

客曰奉審之事既得聞命矣請問奏本之議主人曰  
諾壬辰之亂天將李提督如松既復三京癸巳四  
月賊退屯嶺南猶窟居沁海十餘郡請和東征將士  
憚於進戰議退守鴨綠使沈惟敬與賊將平行長約  
和行長遣還兩王子使小西飛彈守久大夫進請封  
貢之恩兵部尚書石星始以救東爲已任力排退守  
鴨綠之議至是反用惟敬之計欲以和事退賊謾言  
賊歸賊猶肆兇如舊是冬奏請之行我國乃發其欺  
罔之事諸將爲科道所彈故諸將皆致怨於我曰以



怨報德又曰人心之險一至此哉又曰朝鮮狡詐又曰吾怕爾國殺我了又皇勅曰朝鮮尺土一民朕無與焉朝鮮其善自為計又撤還劉兵退守鴨綠之令已至我國罔知所為甲午四月宋經略應昌罷去顧侍郎養謙代之止陳奏使許瑄於遼東俾不達遣叅將胡澤移咨我國大臣責以句踐屈已自強之事且令奏請和事於是衆議不一或以為我國不可與於和事賊來則寧渡遼而已顧咨斷不可從也或以為不得不從顧咨而奏本大指只將賊情開陳而已留叅將月餘而議猶未決領相西崖上劄曰我國既



無以自振但欲倚賴大國以圖興復而宋經略李提  
督皆已罷去顧侍郎纔至所言之事又一向堅拒任  
事之臣拂然背坐不肯同心則我國之事無乃益膠  
孤乎 上可之五月十七日 上接見胡叅將許以  
奏聞一如顧指而難其措語二十六日 命招備局  
堂上議奏本大旨西崖約牛溪同入對時忠清監司  
李廷菴狀啓請姑許倭和以為緩兵之計登對初左  
右爭陳廷菴可斬牛溪素知廷菴忠信大節恐得重  
罪乃啓曰廷菴之意實出於盡忠報國作此難言之  
說似不必重加罪責也 上不悅及對奏本之問牛



溪曾與西崖議合陳不可不奏請之意一如西崖劄  
辭上尤不悅西崖終不敢發一言而退翌日下  
教欲傳位世子西崖上劄辭職牛溪上疏待罪批  
曰有懷必盡人臣之道况人之所見不同何妨之有  
宜勿辭更加盡言所懷時邊將邊曼龍者有與賊通  
書之事備忘記邊曼龍潛自通書乞和於君父之  
賊其罪上通于天子固憤憤必欲誅之以扶人紀今  
人心不淑邪說肆行古人曰邪說之害慘於洪水猛  
獸予朝夕人誠不忍聞此議者曰邊迷劣人何咎焉  
有識之人則以有識恕之迷劣之人則以迷劣饒之



然則天地間更無是非刑政惟恣行宵臆滅絕倫紀者皆可為憂國忘身之人矣云云有識之人指牛溪故牛溪上章乞退 上有詩曰一死吾寧忍求和顛不聞如何倡邪說敗義惑三軍 傳曰奸人邪說惑世誣民一至於此又曰元今朝廷處置及邊將所為皆為渾邪說所誤曰 命榜示朝堂朝廷不即奉行則 御製詩三下備局必欲成罪故臺諫東崗金字顯等相繼而起請治和事之罪曰必須早定王法然後無愧於 祖宗有辭於後世云云蓋欲歸罪於牛溪將加顯戮也丙申冬楊邦亨等不克成封事而回



丁酉春清正復屯西生浦 皇上以關酋負朝廷大  
恩戕殺官兵荼毒朝鮮將石星下獄沈惟敬拿問發  
水陸兵十二萬以討賊李璣以大司憲欲乘此機論  
陷牛溪西崖止之夏五月宰列退居其鄉者推考時  
御筆抹去牛溪姓名以降以此乘時抵忤者不遺  
餘力時李爾瞻鄭仁弘等與西崖角立互相排擯爾  
瞻等非推尊牛栗者惡於攻西崖倡言主和者成龍  
而反以成渾為主和成龍真姦邪也由是時人不敢  
恣意攻牛溪戊戌春 上以辨誣事議遣大臣 上  
特命西崖而崖辭以母老又有待大臣不可以牛維馬



繫之語 上盛怒於是甬瞻等首先論劾儒生尹宏  
柳浦洪奉先崔喜男等相繼投疏西崖罷歸冬鄭仁  
弘門客文弘道以主和為目抵斥西崖削其官爵右  
議政白沙李恒福上疏言臣曾在南中與李元翼語  
及時事臣謂今日國勢如人氣窒喉間百脉將絕必  
先下此氣然後生道可議此言惟元翼聞之他人不  
知然臣何敢謂人不知而隱然自諱乎今既以此罪  
成龍則次第鋤削當及臣身矣己亥六月 上命還  
西崖職牒三司又論之 上答曰論事過情則非但  
其人不服傍觀者亦不服矣以主和二字為執言之



地至比成龍於秦檜檜受虜人旨保全妻子而潛來  
于宋所以為金謀力主和議殺岳飛等今成龍亦有  
潛通陰謀之事乎是說足以服人心而定國是乎蓋  
其心憫 宗社之將亡 天朝既令許和故權就其  
事律之以直道則予亦不敢不謂之誤也原其情不  
過如此而已嗟嗟其時孰不靡然到今爭自脫然曰  
余無是也余無是也此皆右相之罪人也且排衆論  
夜半遣使之說尤不足道其時廣收廷議在政院可  
考也時牛溪歿已逾年矣越四年壬寅 谷善山儒  
生金翬疏曰當君父枕戈對壘之日揚臂君前乞和



讐賊不知此義何居予卽面責退而不勝憤憤題詩  
壁上以爲彼哉彼汝知予詩乎此成渾之罪案也  
荅韓孝祥疏曰導君父乞和讐賊云蓋賊與我既  
爲讐敵大小臣僚皆以爲不可和是時許欵之議制  
在 中朝非我國所能爲也設以爲罪西崖爲首廷  
輒次之牛溪又其次也 上於西崖分疏若此獨於  
牛溪屢下 嚴教然後人皆知和議非牛溪之罪而  
上怒實出於譏間故前後攻牛溪之徒相繼而出  
吹毛覓疵無所不至未嘗有及於斯者若非西崖則  
牛溪之罪不在於遺君黨奸而專在於和議其罪不



止於削職而終至於竄殛必矣大抵與和議一事人心可知西崖主論東崗無一言攻介而牛溪之被上怒也東崗請以早正王法西崖削奪白沙陳劄力救而牛溪之被罪也白沙無一言伸救彼東崗白沙皆是流俗中頭角稍秀者其處心行事猶尚如此其餘懷邪觀望隨勢變易之輩何足責乎

客曰奏請和事非西崖牛溪之罪不待主人而人皆知之矣壬辰之亂或以爲西崖所致至比於秦檜此議何如主人曰不然平酋求和辭極兇悖于時西崖當國主論其心以爲許則無事不許則有禍欲許之



上令廷臣二品以上獻議李韓興山甫以為不可  
許尹海原斗壽以為宜奏聞天朝其餘皆以為便  
及其亂作爭相攻擊比之於秦檜此豈獨西崖之罪  
哉不過偏黨詆毀之論也客曰趙重峯起兵疏亦曰  
成龍之主和招寇甚於檜奸然則重峯其亦偏黨詆  
毀之類歟誠如是豈可謂之重峯乎主人曰若子所  
謂知其一未知其二者也西崖之主和也獨重峯知  
其大亂丁亥辛卯五六年持斧伏闕叩頭流血叩  
頭不已至於痛哭西崖終始不聽重峯之以西崖比  
之秦檜雖似過激決非偏黨詆毀之論也客曰然則



西崖此外他無可議者乎主人曰不然西崖雖謹慎  
當國累年豈無所失李潑之老母推鞠松江則使其  
女醫扶護起居嚴刑命下終始力拒西崖則不禁  
獄卒任意驅曳坐視壓膝一言不救鄭彥信之妄發  
上震怒大司諫崔滉請按律定罪上即命賜死  
松江極力伸救而西崖則不與惟私語曰宋朝亦有  
盧多遜云云崔守愚之被鞠松江約西崖同救而西  
崖初諾後異旋曰如我者何敢救解云云金德齡之  
死金應南鄭瑑諸公相與救解而西崖則非徒不救  
反以為縱而還擒未之思也云云黃廷或號召檄有



曰廟堂力主和金秦檜之肉欲食此則黃慎之所作也以此黃廷或真偽兩書匿不以聞使其父子終身坎軻黃慎留賊陣三年日差日本使臣幾死幸生此則西崖之未盡處豈可謂他無可議者乎又有一事鵝溪與人言言必稱栗谷為聖人松江為多病痛君子語及牛溪哂而不答西崖每稱贊栗谷曰叔獻能見數十年將來之事如我輩身親當亂罔知所為使國事至此我輩是叔獻之罪人也嗟歎不已至於重峯人有問者惟曰生前未知其賢死後知之何關壬辰錄元射一賊斬一賊者無不昭載獨於重峯一言



不及非徒一言不及某年間重峯胤子完堵上疏請  
廢賞同時死節之士西崖防啓時金粹徐仁元以錄  
勲都監入啓曰此人忠烈非他義兵之比請一一廢  
獎以勸後人西崖猶牢拒不許完堵又疏斥西崖以  
為懷嫌西崖上疏辭職 上答曰狂夫之言何足取  
乎金徐之於重峯其讐怨與西崖少無差等而西崖  
之防啓金徐之請廢相反若此孰是孰非愚不敢知  
也客曰黨論之偏雖日甚一日其中亦不無一二公  
心者而未聞有一人愛惜牛溪者何也蓋有之矣我  
未之聞歟主人曰西崖之於牛溪人多以為不相得



此乃不知者之言也玄風人朴惺嘗上疏托以陳時  
務末以牛栗為奸黨之魁小人之難卞者至謂牛溪  
搆殺崔永慶欲為將來誣陷之計西崖見疏謂其幕  
士韓嶠曰朴惺為人君知之乎非失性安得為此言  
慨歎久之松江削奪後時人以牛溪為松江之黨欲  
加之罪問于西崖西崖曰成某本以山野之人 聖  
上破格待之屈已下之如使成某出為世用則未知  
為君子耶小人耶今朝廷未嘗試用而遽以重罪加  
之則於成某少無虧損而其於傷國體累聖德何其  
議遂寔吳判書億齡兄弟與牛溪有族分所見雖殊



情則相切牛溪歿後十餘年判書舡過長湍石壁望見牛溪舊基卽題一絕曰白屋遺基在青山舊迹非孤舟揮淚過江雨暮霏霏望遺基揮淚而過則其無攻斥之心可知未知吳家子孫曾見此詩否其必有悲感者矣韓久庵西平兄弟與牛溪交道甚踈牛溪之削奪西平奮臂大言曰謂松江構殺永慶者艱難做說話今又以牛溪為構殺古今天下寧有是事云云久庵嘗為坡牧待牛溪夫人如事親戚所得珍饌連續不絕時往溪上與成永同文濬講論太極諸書李叅判廷馨臨終謂其子孫曰邪佞之輩攻擊牛溪



汝等萬一叅論則非吾子孫也云云是以牛溪立祠  
時叅判子孫協力相助其後子溥以營建有司終始  
往來以此推之黨論雖偏亦豈無一二公心者乎癸  
亥以後黨論尤甚偽造御批偽造乞糧丈人多傳  
誦不以爲恠相與雀躍自以爲得不知者謂之牛栗  
之不幸也愚則以爲牛栗之大幸也客曰何謂也主  
人曰夫資非上聖學非大成則氣質之病言行之疵  
在所難免今之論牛栗者若就其論議上而曰某論  
有病就其行事上而曰某事有失則此固君子責備  
之說雖推尊牛栗者何敢有所論辨乎今乃不然構



虛捏無無所不至猶以爲不足終至於偽造

御批

極其凶悖則前後攻斥皆是此類茲豈非牛栗之大  
幸也客曰朴守庵枝筆朴鼎山澗嘗謂人曰天爲我  
朝數百年 宗社生栗谷爲吾東方萬古綱常生重  
峯其意非偶然也未嘗試用皆已早歿天意未可知  
也云云守庵鼎山是何如人而其言若是耶主人曰  
此二人出自寒微非東西黨與中人物其爲言豈無  
所見而發也客曰主人於偏黨深惡痛絕如避仇敵  
固其宜也但論議間至謂之無父無君弑逆之徒竊  
恐其言似爲過矣主人曰子不讀論語乎論語苟患



失之無所不至大文下註朱子以為吮癰舐痔弑父  
與君皆生於患失也今之偏黨皆是患失而有甚於  
古之患失則愚之所言豈為過乎客曰主人既以謔  
間奉審奏本三事一一論辨其他未盡之說又從而  
歷陳之使無識後生得有所觀感而興起焉豈非大  
幸遂辭去主人記其語名之曰買還問答

牛山答問

癸未冬十二月牛山主人答澤堂書別紙有曰我  
朝數百年間名賢相繼而出至論其真儒則綴數人  
而已麗季吉注書并言行出處是楊雄之徒而史以



遺逸節義大書特書至比於夷齊後之作史者以此為戒諸名賢事業功德筆削之際尤不可不慎也云云蓋澤老與主人為相知方受纂史重任故主人言及之矣後數月客有來訪主人者謂主人曰聞主人與澤堂書曰我朝數百年間名賢相繼而出真儒則綏數人而已云然耶主人曰然客曰名賢真儒其有異乎主人曰異客曰然則何如斯可謂之名賢何如斯可謂之真儒乎主人曰有學問有餘而節義不足者有學問不足而節義有餘者與其學問有餘而節義不足不若學問不足而節義有餘者名賢真儒



之異不在於學問而在於節義而已客曰不然學問  
不足而節義有餘者或有之矣未有學問有餘而節  
義不足者若學問有餘而節義不足則如無骨之人  
肌肉徒肥而行止步超不得自任真箇是鄉愿之類  
也謂之學問不可也謂之節義充不可也有餘不足  
何暇論乎主人曰然古之人節義在學問中今之人  
節義在學問外愚請粗陳厥由試詳聽之吾東方學  
問自鄭圃隱權陽村始論其學問則陽村過圃隱遠  
矣論其節義則陽村無足可觀至于我朝其弊猶  
存學問節義分而為二名賢雖多而真儒則少舉世



之人莫之能辨此愚之所嘗慨歎而目之以名賢真  
儒者也客曰主人之言極是極是但節義見於亂世  
若太平無事之時則何以知之乎主人曰是不難只  
觀其行道與不行道而已矣客曰然則行道者謂之  
真儒不行道者謂之名賢乎主人曰然客曰不然三  
代以上唯伊尹周公行其道三代以下雖以孔孟之  
聖程朱之賢俱不得行道然則孔孟程朱皆不得為  
真儒乎主人曰不然周季宋末非行道之時孔孟猶  
棲棲遑遑轍環天下者欲行其道也程朱不在其位  
惓惓以行道自任孔孟程朱雖不得行道是亦行道



也客曰然則主人所謂名賢真儒可得聞歟主人曰  
考其言行出處則可見何必辨某也名賢某也真儒  
然後知之乎客曰不然此於吾道不是小事主人慮  
有後患不欲分明說破竊爲主人不取也且主人既  
發言於澤堂若澤堂移書請問則主人其將含默不  
言乎主人曰然姑舍名賢請言真儒圃隱後惟靜庵  
栗谷重峯自少有經濟大志及登第立朝不量時勢  
不計利害惟以致治三代爲已任則此三賢雖不得  
行道其與行道者無異矣客曰三賢之行不待主人  
而無不聞知者矣安知此外亦有如三賢者乎主人



曰然豈無其人知之為知之不知為不知愚之所知  
惟此三賢則何可強其所不知者仰彼唇舌自同於  
衆人乎客曰三賢中亦有優劣乎主人曰然豈無優  
劣非區區淺識所敢輕議姑舉其易見者論之則靜  
庵之資稟絕勝於栗谷而造詣之深栗谷為優重峯  
之資稟造詣雖似未及於靜栗而見識之高明設施  
之言訃靜栗皆不如重峯之纖悉備具愚所撰東還  
封事抗義新編君宜仔細去看若重峯實箕封以來  
數千載間所未有之真儒也噫天不生真儒則已如  
生真儒則使斯民不得蒙至治之澤何也天意未可



知也雖然非三賢圃隱之學幾乎絕矣或者天意其  
在此乎客曰名賢真儒之辨既得聞命矣主人與澤  
堂書又以治隱吉再為楊雄之徒云然耶主人曰然  
客曰治隱之言行出處與圃隱並稱人無間然者今  
已久矣主人生乎數百載之後有何所見而如是立  
言耶不瑕有衆人之謗歟主人曰不然凡人之所見  
各自不同愚之所言誠有可據則衆人之謗何足憂  
乎子未曾見治隱上 恭定大王書乎客曰未見  
也主人曰治隱與 恭定為同學故舊及 恭定為  
世子下書徵之治隱乘傳至京 恭定啓于 恭靖



大王授奉常博士治隱不詣 闕謝恩上書 恭定  
曰再於昔日得與邸下讀詩泮宮今日之召不忘舊  
也然再於辛朝登第筮仕及王氏復位即還于鄉若  
將終身今者記舊徵召再欲上謁即還從仕則非再  
志也 恭定曰子之所言乃綱常不易之道也義難  
奪志然召之者吾也官之者 上也告辭于 上可  
也治隱上書 恭靖曰臣本寒微仕於辛氏之朝至  
門下注書臣聞女無二夫臣無二君乞放歸田里以  
遂臣不事二姓之志孝養老母以終餘年云其曰辛  
朝登第筮仕及王氏復位即還于鄉若將終身云者



是自處以辛氏之臣而非王氏之臣也又曰臣本寒  
微云者是隱然以家世不食王氏之祿自諉也家世  
寒微雖不食祿非五百年王氏之民乎以五百年王  
氏之民臣於賊肫之子則真是楊雄之徒而其爲言  
殆有甚焉者愚雖不敏豈敢爲無據之言以駭人之  
瞻矚耶大抵此二書當時後世孰不見之諸公記事  
一言不及是非真偽世無知者反爲之推獎太過至  
比於夷叔夷叔何其辱哉誠可痛心愚性本踈慵不  
能與世俯仰自少至老積謗如山今又爲狂言妄談  
無少顧忌非不知言纔出口身禍立至矢在弦上不



得不發詆斥前賢之誚是所甘心同流合污之譏庶  
幾免夫子其諒之客曰名賢真儒古今所不言冷隱  
出處前後所未知今日主人聞所不聞豈非大幸遂  
辭去

師友鑑戒

或問於余曰公自少疾偏黨如仇敵每言及必以爲  
弑逆之徒雖似過激人皆歎服至如重峯趙先生黨  
論之偏比他人不啻百倍舉國之所共知也公獨以  
爲不然至使我師友皆欲取則焉公之所見愚竊恠  
焉余笑而答曰若子徒觀其外未見其內者也重峯



之偏黨得名不過痛師友受誣為此過激之論也爲  
師友論議過激是他日爲君父伏節死義之本也吾  
當爲子略陳其梗槩子其聽之重峯家世貧寒幼有  
志行年纔四五歲與羣兒隨長老讀千字文於林亭  
亭臨大路有達官盛威儀過亭下者長幼咸奔遑瞻  
望獨先生凝然咿唔不絕達官大奇之卸馬登亭招  
先生語之曰衆皆觀我行色汝獨不然何也先生曰  
不遊目讀書父命也達官擊節嗟歎曰問先生父名  
請與相見曰吾東方真儒今又出矣爲公私深賀坐  
語良久極其禮敬而去及年弱冠遊館學時諸生論



妖僧普雨數月伏

闕諸生皆疲困或往來其家或

退歇外廡惟先生朝夕飯外自初至終未嘗頃臾離

次諸生皆自以為不及二十四歲丁卯年登第庚午

以校書正字守香室時降香佛寺先生以為文廟佛

寺不可以混同頒香抗章上怒特命奪告身明年

辛未再入香室又上疏曰口讀聖賢書手封供佛香

臣所未忍也自上震怒論以重律賴兩司玉堂大

臣力救得免於是先生名動京鄉上自朝紳下至章

布知與不知無不願交一代如朴思庵盧蘇齋許草

堂李山海權德輿柳成龍金字顯金誠一崔永慶鄭



速李潑尹先覺許筭洪可臣金晬鄭汝立諸人爭相  
推許以為國家安危係斯人出處土亭每言人徒知  
汝式師我不知汝式真我師也其見重於師友間如  
此及乙亥年東西分黨之後思庵汝立為西人其餘  
皆東人而栗谷與思庵蘇齋欲調停兩間共為國事  
而自古分黨君子之不幸小人之幸而君子常少小  
人常多故栗谷終為羣小所嫉陰伺間隙謀陷百端  
而道無從癸未侂胡之亂國家多事滿朝宰列思庵  
蘇齋以下皆是伴食罔知所為栗谷以兵官大為  
上所倚重凡策應之事無不擔當而募民納馬廢孽



許通等事皆其時舉措也嘗被召赴闕栗谷素有眩暈之疾未及闕門舊疾遽作入古兵曹以待其

差於是三司合啓攻擊有驕蹇慢上專擅國柄其志將欲何爲之語栗谷遂退歸海州時汝立在全州慨然發憤曰此乃已卯羣奸網打士類手段爲士者不可緘默欲自抗章伸救聞許筠宋應旼等遠竄曰此盛德事也臣子何敢言乃止其時士子五六人適會汝立家語及時事汝立曰栗谷聖人思庵賢相李廷鸞曰栗谷雖賢聖人則無乃過乎汝立指庭邊柿實曰已熟者孔子半熟者栗谷半熟者其未盡熟乎又



曰李潑嘗師事栗谷及論議不一倒戈陰陷甚於他人其不可測也又曰柳成龍外托儒名內實巧詐在朝執論後患可慮廷鸞曰凡論議有始有終可也吾恐兄之所見後不如今日也廷鸞是汝立再從兄弟而世居隔隣者也九月汝立貽書栗谷曰自後者愠于羣小狼狽出關卧不安席食不知味且欲披肝瀝血極言奸人媚疾誤國之狀以瀆天聽而既而復思則方以無狀見棄於君父其義似不可強顏以言而復有成丈為之上章陳辨則立雖不言亦無所恨矣繼聞成丈亦遭譏謗裹足還山焚坑之禍迫在



朝夕忠憤自激不可後止乃欲糾合同志抗章杜闕  
旋聞聖心開悟如日中天魑魅之屬將自退伏又  
自隱忍而止以今觀之一二憮人雖見貶逐巨奸尚  
握時論樂禍之心噫然其未已不幸而天不悔禍則  
立恐後日之憂將有甚於今日而不可救也言念及  
此不覺心寒目今朋友十分可恃者甚少區區所望  
於尊兄者比前尤切其志亦可哀矣云云未幾栗谷  
承召入京十一月汝立又貽書曰竊惟吾君獨  
排羣議至拔尊兄於衆惡之中使為冢宰任之不貳  
此誠漢唐以來所未有之盛舉也凡在見聞孰不感



激涕零而立之喜有甚焉者云云而其時湖南儒生  
徐台壽等五十餘人抗章救栗谷皆是汝立之所倡  
也然則癸未以前汝立決不為東人也明矣先生師  
事牛栗齊輩中與李潑一隊最切而李尤重先生以  
其用舍為身之進退焉栗谷為吏曹叅議時李以佐  
郎欲大用先生謂栗谷曰汝式用之則大用不然置  
而不問可也栗谷曰汝式雖有經濟大志而才不逮  
太固執不量時勢遽以三代之治期望君父不如  
意則必有牽裾折檻之患矣君與汝式既為心交而  
徒以汲汲拔擢為能事則於汝式無益而反有害也



聞汝式今方讀書云稍待五六年學成然後用之亦未晚也君其熟思之李曰自少讀書之汝式公言尚如此元不讀書如我輩何可一日從仕欲辭退栗谷不能止李以先生連擬臺侍諸望時先生以通津內奴杖殺事已得罪於上終未蒙天黜未幾李以承旨朴好元相避亦見適先生之於李其許與之重如此壬午年先生爲全羅都事則鄭松江澈以新監司將到境李謂先生曰君與李涵無一面之分焉知其凶險不測乎以君之剛腸疾惡不可與同事先生信其言松江至全州先生避走參禮驛松江遣人請



之曰都事亦有傳掌事不可如是亟行先生乃還府  
松江把酒問先生曰公以我爲凶險不可與同事徑  
自避去云然耶先生曰諾松江曰公與我素昧平生  
何以知其凶險耶旬月同事洞知其情狀然後去似  
未晚也先生曰吾意已定遂辭去松江貽書栗谷使  
之勸送先生不得已乃還以松江不治事嗜酒流連  
爲不可巡行列邑不飲官酒松江至作詩嘲之先生  
反以赤子血不忍飲歌而和之終始不變李之於先  
生其信愛之深如此是以栗谷被誣之時彼此是非  
邪正昭如日星雖市井賤隸之輩無不扼腕憤發皆



欲抗章訟寃而先生爲李旣拘論議猶未定至於疏  
中亦曰崔永慶朝過而詈珥金字顯夕至而嘲珥臣  
始疑之以爲永慶林下無求之人字顯進退端方之  
士其所譏呵必有所自云云然則癸未以前先生決  
不爲西人也明矣及甲申正月十六日栗谷歿汝立  
即叛之揚臂大言曰自癸未春夏間余始覺李珥之  
無狀移書絕交但恨其不早也東人攻栗谷者聞之  
喜而雀躍崇獎吹噓如恐不及乙酉夏五月汝立以  
弘文修撰承 召上京於 榻前詆斥思庵牛栗曰  
朴淳奸邪魁首李珥誤國小人成渾黨奸陳䟽欺罔



君父湖南朴淳故鄉海西李珥所居其地儒生等  
疏皆是淳珥所指喉而非公論也臣入城之後往見  
成渾責以黨奸欺君之罪又言絕交李珥之意則成  
渾無一言服罪矣上曰李珥生時汝極推尊今何  
若是耶汝立對曰臣當初不知其心術後乃覺悟未  
死前絕之久矣上不答汝立慚懼而退及義州牧  
使徐益上疏極言汝立欺罔之狀以其癸未九月書  
略及於疏中上問筵中諸臣曰汝立與李珥書卿  
等曾有聞見者乎李德馨對曰臣與李貴同里間嘗  
以其書示臣矣金弘敏亦對曰臣未見其書曰人傳



說已聞其書中辭語矣 上曰汝立反覆無狀者又  
曰今之邪怒也汝立情迹既露耳目難掩則患其無  
辭反以語人曰此乃未絕前書其後有絕交書云栗  
谷從子李景震上疏又以汝立癸未十一月書書進  
於是衆口喧騰皆唾罵之汝立遂敗走李猶以為不  
然先生始與李角立往復論辨李不聽先生遂移書  
絕交然猶不忘舊情常懷慨歎時洪可臣出宰湖西  
李在南平居憂冬先生自金浦衝寒冒雪徒步至湖  
西與洪極言推尊牛栗之意洪曰栗谷未免為小人  
先生曰公對我公然以亡師斥之為小人君之心事



可知矣拂衣而去洪曰吾與之戲耳君何至此起而挽之先生不聽仍往南平與李爭辨以背叛栗谷責之李曰栗谷非聖人安得每事盡善至於背叛吾無是也君言誤矣先生曰鄭大甫之反覆無狀路人所知而君不卽絕之反與同事何也李曰人之所見有始是而終非者有始非而終是者大甫有何所失殊無悔悟之意先生悲辭苦語息息不已者凡十餘日李猶不聽先生曾爲都事時李以其所着毛掩贈先生至是先生謂李曰君不從吾言偏執已見排斥牛栗獎許大甫異日噬臍莫及既已絕交則此物不可



以留以其毛掩還之遂握手揮涕而別時朴天挺兄  
弟在座天挺與先生舊相識先生既去天挺問李曰  
汝式何如人李曰三代上人物但固執是病痛耳天  
挺曰吾東方末世豈有三代上人物公言過矣李曰  
汝式非君與吾所敢擬議起而視日早暮曰今日汝  
式行幾里而止宿乎多有眷戀之情其後李上京到  
公州時先生以提督官在州庠李請與相見先生辭  
避而不見以詩謝之遂自丙戌冬至己丑夏九四年  
間連上萬言疏伸救師友又極言時政得失三司合  
啓請罪謫配吉州嶺東驛時數月霖雨道路泥濘人



不得行畿海嶺東癘疫大熾死亡十七八先生徒步  
登程季弟典年十八號哭隨之先生獨與典及其子  
完基自沃川至嶺東二千餘里艱關跋涉足腫脰血  
意氣自若至春川府使權德輿瞰其行色歎曰真箇  
是鐵漢也蔡元定無以加矣及其配所闔村以癘氣  
死者不可勝數典完基及二奴皆染疾完基僅得生  
奴與典皆死先生精於醫術遍行病村中投以鍼藥  
賴以全活者甚多先生終無恙方東人之攻先生也  
或以為凶險或以為巧詐或以為邪毒或以為恠鬼  
多般指目無所不至許筭見其啓辭笑曰余曾與汝



式萬里同行知汝式心事者無如我也以汝式為虛  
懷聽信人言致有此疏則猶之可也若以凶巧邪恠  
加之於汝式則汝式必不心服而後世不得為公言  
矣蓋先生見東人之主張論議者惟以排斥牛栗為  
發身之資其於國家安危生民休戚則置之於相忘  
之域慨然發憤不論人物本品之如何只觀形迹推  
尊牛栗者盡為之君子排斥牛栗者盡謂之小人其  
所論議憤激不中如此遂使仇怨堵立以至於按治  
其居停主人抵以罪親舊皆畏禍及聞其至輒杜門  
不見其終始不改者惟沈一松喜壽金南窓玄成數



人而已先生伏闕時一松以食正日日往問又以  
詩慰之有狂言滿紙皆忠膽鼎鑊當前戴聖明之句  
南窓聞其被竄追往不及以毛衣一襲贈送其詩曰  
一領羊裘寄遠行臨風只欲淚沾纓湘潭莫續懷沙  
賦重保餘生慰聖明人多危之二公不以介意先  
生嘗於謫中答友人書曰區區愚騃之計擬欲以海  
內萬物各得其所而反使我一家老幼先失其所二  
十年讀書猶未達乎淺深揭厲之宜自蹈斯禍誰怨  
誰咎金伯胤已卯黨籍今始抄錄而還之恐未暇一  
體驗也宋玉只招三閭之魂不敢明言師旨於楚



廷其意有在而已卯門生乃欲以衆力撕握其能不  
及於大亂耶其流之禍極於乙巳而至于今日又使  
我師友當之尚忍言哉尚忍言哉於此一書先生抱  
負之志亦可見矣先生嘗論汝立必叛及汝立謀逆  
事覺李兄弟皆斃杖下金字顓定配北邊而去先生  
特命蒙赦而還行出一路巧違不得相見先生令  
其子完堵貽書字顓曰中庠從事之初豈意時事之  
至於此極乎洪水猛獸之患幾乎迫及於君父而  
流聞風議之末大以鄙言為非云不圖年兄之得此  
於梁楚之郊也湖南之按雖一繳三山之論來辭嚴



屬非一筆可抗則後雖絕口而心常耿耿愧倖尹伯  
說問憲往絕李洪之由曰若與心交則何不累書昭  
辨期於必悟乎固知昔日強項時百書難回矣反覆思  
之則伯說之言最近於忠厚而山川悠遠夢寐不到  
奈如之何謫中艱苦之味憲所備嘗而兄之所往更  
鄰乎野人藍開雪擁之句幾入思詠由非朝夕之友  
而禍纏於此揣分度義思欲痛哭而靡從也餘祝終  
琢乎玉汝之地以慰遠人之望幸甚未幾李母夫人  
尹氏亦被拿先生自沃川佩酒徒步邀於中道伏謁  
路左尹氏初不知為先生也先生曰我是趙某尹氏



大驚曰公何自来見我耶吾兒曾用公言豈有此事  
大聲痛哭先生亦痛哭以酒跪進之尹氏曰吾平居  
以酒扶持公所知也自變起一勺不入口公之至誠  
若此吾安敢不飲連進數器先生又以毛衣親覆尹  
氏身上曰日寒如此願備行資尹氏曰歸見亡兒於  
地下當以此事一一言之又痛哭先生亦痛哭及尹  
氏登程先生泣而送之山回路轉不見然後乃止泣既  
而李妻繼至先生又以一襦與之相泣而別厥後每  
語及李事輒嗚咽不能言傍人亦爲之感動南窓嘗  
謂余曰自分黨之後師友之道不全甚矣惟其全之



者獨趙汝式而已昔在辛卯年間吾出宰錦山有一朝士以使命巡行到郡會汝式自沃川亦來吾三人皆故舊懸燈夜話語及已丑獄事汝式為景涵咄咄嗟惜朝士曰景涵之同叅逆謀雖萬萬無理原情定罪則死且不恠矣汝式當杯投地背面而坐謂朝士曰景涵非公之素所親厚者乎使景涵不死生存則公言猶之可也既已寃死則公何為出此言士君子師友之道果如是乎流涕不已朝士大慚深謝汝式終不快釋雖似過激亦是師友之所可法者也當今知汝式者莫如君而此事君必不聞故略及之余問



朝士姓名則南窓顧而言他蓋不欲其傳之也噫先生之於李雖已絕交終始眷戀其生其死痛惜若此此實人情之所不能到而古今天下所未嘗聞也然則前後陳疏不過救師友而已東西二字了不關於其身而不知者反以為偏黨夫所謂偏黨患得患失趨時附勢吮癰舐痔弑父與君者之所為也豈先生之所忍為哉如使先生少有偏黨之心則舍故舊薦已之徒其誰與為黨乎大抵自光海朝至于今數十年來偏黨之論日以益甚至於南漢之圍瀋陽之拘亦未免形色之分元有血氣孰不憤惋雖然彼西南



此許多士夫豈盡庸惡陋劣之鄙夫乎其中亦必有  
知君父師友之道者一朝幡然覺悟洗心滌慮各自  
奮勵先國家之急而後私讐怨一如先生之所爲則  
偏黨之禍將不至於相戕相殺而和平之氣像國祚  
之延長庶幾可望盍相與勉之哉


記夢

己卯夏余以肅謝事五月十五日發行寓宿于南平  
李守白溪堂十六日到長城鄭女家夜深就寢王父  
鈍菴公以手撫余頂曰汝不聞萬適二字為某字亦不知爲  
坐則乃一夢也初不知萬適二字為某字亦不知爲




人姓名私語於心以為萬適必是晚節頗自恠歎鷄  
鳴頭痛腹疾一時俱發不得已十七日昇還于家病  
勢似歇十九日朝余披覽牛溪先生文集集中一疏  
有曰陳州布衣萬適被徵至京數日而死人皆笑之  
云云余於是感而流涕曰若冒熱登程則其為萬適  
之死必矣此先祖神靈告我也決意停行欲陳一疏  
以待逋慢之罪亦不得趁時投進而止臣子分義極  
為惶悚語恠聖人所戒此事甚昭昭故略記于此以  
示吾子孫云


牛山先生集卷之十終













燕 趙 下